



## Early Journal Content on JSTOR, Free to Anyone in the World

This article is one of nearly 500,000 scholarly works digitized and made freely available to everyone in the world by JSTOR.

Known as the Early Journal Content, this set of works include research articles, news, letters, and other writings published in more than 200 of the oldest leading academic journals. The works date from the mid-seventeenth to the early twentieth centuries.

We encourage people to read and share the Early Journal Content openly and to tell others that this resource exists. People may post this content online or redistribute in any way for non-commercial purposes.

Read more about Early Journal Content at <http://about.jstor.org/participate-jstor/individuals/early-journal-content>.

JSTOR is a digital library of academic journals, books, and primary source objects. JSTOR helps people discover, use, and build upon a wide range of content through a powerful research and teaching platform, and preserves this content for future generations. JSTOR is part of ITHAKA, a not-for-profit organization that also includes Ithaka S+R and Portico. For more information about JSTOR, please contact [support@jstor.org](mailto:support@jstor.org).

## ANALECTA.

LXXIII. Cicero Ep. ad Atticum 1 9 *Thyillus te rogat et ego eius rogatu Εὐμολπιδῶν πάτρια*. legebatur olim *Chilius*, nomen neque auditum alias neque credibile neque scriptum in libro Mediceo: habet enim *chiyllus* et in margine *thyullus*. recte vero Kayserus et hic et in aliis duabus epistulis Thyilli nomen restituit. 1 12 2 *liberum ego habeo, sane nequam hominem, Hilarum dico, rationatorem et clientem tuum. de eo mihi Valerius interpret nuntiat Thyillusque se audisse scribit haec et quae secuntur*. hic *thyrlus*que est in Mediceo libro iterumque commenticium Chilii nomen locum male obtinuerat. tertio id factum est 1 16 15, *epigrammatis tuis quae in Amaltheo posuisti contenti erimus, praesertim cum et Thyillus nos reliquerit et Archias nihil de me scripserit: ac vereor ne, Lucullis quoniam Graecum poema condidit, nunc ad Caecilianam fabulam spectet*. Mediceus liber *chlylius* et in margine *vel thlilyus* habet, Cratandri exemplaria *Thylius*. ad epigrammata quae Atticus in Amaltheo suo, villa Epirotica, posuit pertinent quae Cornelius Nepos in vita eius cap. 18 scribit, *attigit quoque poeticen, credimus ne eius experts esset suavitatis. namque versibus qui honore rerumque gestarum amplitudine ceteros Romani populi praestiterunt exposuit ita ut sub singulorum imaginibus facta magistratusque eorum non amplius quaternis quinisque versibus descripserit: quod vix credendum est, tantas res tam breviter potuisse declarari. est etiam unus liber Graece confectus de consulatu Ciceronis*. accepit Cicero commentarium de consulatu suo ab Attico Graece scriptum kalendis Iuniis anni ab u. c. dcxciv, quod narrat Ep. ad Atticum 11 1. illa epistula in qua epigrammata Attici commemorat, quae Latina fuisse e Corneli narratione colligimus, scripta est mense Maio anni dcxciii. fefellerat tum Ciceronem spes quam conceperat fore ut res a se gestas Thyilli Archiaeve, Graecorum poetarum, carminibus illustratas videret.

De A. Licinio Archia Antiochensi non repetam quae nota sunt. illud autem miror, probatum fere esse ab hominibus doctis iudicium Friderici Jacobsii, qui Anth. Gr. t. xiii p. 859, quoniam inter ea Anthologiae epigrammata quibus *Ἀρχίου* inscriptum est nullum sit quod non a mediocris ingenii homine componi potuerit, omnia alius potius Archiae esse putat quam eius quem Cicero exquisitis laudibus exornaverit. inveniuntur in Anthologia non unius Archiae poemata, sed conplurium. nam si Palatini libri inscriptionibus fidem habemus, *Ἀρχίου Μακεδόνης* est vii 140, *Ἀρχίου Βυζαντίου* vii 278, *Ἀρχίου Μυτιληναίου* vii 696 ix 19 111 339, *Ἀρχίου νεωτέρου* ix 91 x 10. hae autem ipsae notationes probabile reddunt ea epigrammata quibus simplex nomen *Ἀρχίου* inscriptum est ad clariorem aliquem ceteris Archiam referenda esse. habent hanc inscriptionem in Anthologia Palatina epigrammata undeviginti, v 58 59 vi 16 39 179 180 181 192 195 207 vii 68 147 191 213 214 ix 343 750 x 7 8, in Planudea iv 94 179. praeterea in Palatina inscribuntur v 98 *ἄδηλον*, οἷ δὲ *Ἀρχίου*, vii 165 *τοῦ αὐτοῦ* (id est Antipatri Sidonii), οἷ δὲ *Ἀρχίου*, ix 27 *Ἀρχίου*, οἷ δὲ *Παρμενίωνος*, 64 *Ἀσκληπιάδου*, οἷ δὲ *Ἀρχίου*, in Planudea iv 154 *Λουκιανῶ*, οἷ δὲ *Ἀρχίου*. denique quod *ἀδέσποτον* est in Palatina epigramma vii 139 in Planudeae libri quodam Barnesiano Archiae tribuitur, eidemque Archiae Planudes dedit Anth. Pal. ix 345 346 347 348 354, quae illic recte inscribuntur *τοῦ αὐτοῦ*, id est *Λεωνίδα Ἀλεξανδρέως*. epigramma Anth. Pal. vii 165 Archiae esse non dubito: praecedit enim epigramma Antipatri Sidonii (164) aliudque Leonidae (163), quorum illud variatio est. ita Leonidae epigramma vi 13 Antipatrique Sidonii vi 14 Archias variavit vi 16 179 180 181, Antipatri epigramma vi 206 variavit vi 207, epigrammate vii 68 expressit epigrammata Antipatri vii 65 et Leonidae vii 67, denique in Planudea Anthologia iv 179 Archias idem argumentum tractat quod Antipater in praecedente ibi epigrammate. non ausim adfirmare omnia illa epigrammata quae inscribuntur *Ἀρχίου* unius esse poetae (quamquam ne cur negem quidem causam video), neque inprobo Jacobsii insignem eis praestantiam negantis iudicium: illud adsevero, nihil in eis esse quod non potuerit Ciceronis aetate scribi. quod autem Cicero Licinii Archiae ingenium magno laudavit opere, nimirum fecit id in oratione qua eum defendit iudicibusque commendavit. et potuit Archias in aliis poesis generibus melior esse quam in epigrammatis. itaque sane probabilis mihi videtur esse eorum sententia qui Archiae

illa epigrammata tribuerunt Antiochensi. videor autem mihi hanc probabilitatem argumento augere posse haud plane infirmo. unam rem eamque ab aliis occupatam Archias quattuor epigrammatum varietate expressit. nihil magis congruere potest cum hominis ingenio quale Cicero in oratione sua § 18 descripsit: *quotiens ego hunc Archiam vidi (utar enim vestra benignitate, quoniam me in hoc novo genere dicendi tam diligenter attenditis), quotiens ego hunc vidi, cum litteram scripsisset nullam, magnum numerum optimorum versuum de iis ipsis rebus quae tum agerentur dicere ex tempore, quotiens revocatum eandem rem dicere conmutatis verbis atque sententiis.*

Sed Thyilli quoque, cuius simul cum Archia Cicero mentionem fecit, aliquot extare puto carmina. epigrammati Anth. Pal. vii 223 inscriptum est *Θυῖλλον*, x 5 *Θυῖλου*, vi 170 *Θυηλάου*, ex quo recte *Θυῖλλον* fecerunt. in Planudea Anthologia epigramma illud x 5 *Σατύρου Θυῖλλον* inscriptum est: quod utrum recte factum sit an potius errori tribuendum (nam *Σατύρου* est quod sequitur epigramma x 6 idemque habet argumentum) dicere non possum. Thyilli autem nomen tam rarum est ut Iacobsius Anth. t. xiii p. 950 se id alibi repperisse neget neque ego praeter Ciceronis epistulas et Anthologiam Graecam usquam legere meminerim. mirum profecto esset si duo fuissent poetae Graeci qui tam rarum nomen haberent.

LXXIV. Cicero ad Atticum iv 4<sup>b</sup>, quae epistula in Antiati scripta est, *Perbelle feceris si ad nos veneris. offendes designationem Tyrannionis mirificam in librorum meorum bibliotheca, quorum reliquiae multo meliores sunt quam putaram. etiam velim mihi mittas de tuis librariolis duos aliquos quibus Tyrannio utatur glutinatoribus, ad cetera administris, iisque imperes ut sumant membranulam ex qua indices fiant, quos vos Graeci, ut opinor, σιλλύβους adpellatis.* a Graevio scriptum est *σιλλύβους*, Mediceus liber *sillabos* habet. mihi *sittubos* potius vel *sittybos* scribendum videtur, de qua voce Lobeckius dixit Prol. path. p. 290. nam in proxima Ciceronis epistula iv 5 haec legimus, *bibliothecam mihi tui pinxerunt constructione et sittybis: eos velim laudes.* ibi Mediceus liber *sit tybis* habet. pro *constructione* placuit nuper *constrictione*, quod volunt significare involucra librorum. mihi designata a Tyrannione librorum conlocatio recte dici videtur constructio, constrictionem autem illam temere excogitam certe Orellius pessime defendit. nam quae Plinius habet Nat. hist. xiii 26 (§ 82) ea ab hac re plane aliena sunt, Martialis autem epigramma xiv 37 sane olim ita scribebatur, *Scrinium. Constrictos*

*nisi das mihi libellos, Admittam tineas trucesque blattas*, verum rectissime Schneidewinus expulso *constrictos* receptoque ex optimis duobus libris *selectos* epigramma ex insulso fecit elegans ac facetum. sittybi illi commemorantur etiam iv 8<sup>a</sup>, *postea vero quam Tyrannio mihi libros disposuit mens addita videtur meis aedibus. qua quidem in re mirifica opera Dionysii et Menophili tui fuit. nihil venustius quam illa tua pegmata postquam mihi sittybis libros inlustrarunt.* ita fere hodie scribitur. habet autem Mediceus liber *postquam misit libros*: verum ex Turnesiano adfertur *postquam sit tibiae libros.* unde adparet scribendum esse *postquam sittiboe libros inlustrarunt.* cogitavit de nominativo Bootius, sed Graecanicam eius formam in illo *sit tibiae* latere non intellexit. in Hygini fabula 178 Micylli *Spartae* Munckerus non in *Sparti* mutare debebat, sed in *Spartoe*. idem *Spartoe* reddendum est Ammiano Marcellino xix 8 11, ubi liber Fuldensis *sparto* habet. idem codex xxii 15 14 non *ἀμφίβιοι* habet, sed *ἀμφίβοι*: adcuratius igitur scribemus *amfibioe*.

LXXV. Cicero in oratione pro Sex. Roscio Amerino § 110 malas artes Capitonis ita describit, *impedimento est quo minus de his rebus Sulla doceatur; ceterorum legatorum consilia et voluntatem Chrysogono enuntiat; monet ut provideat ne palam res agatur; ostendit, si sublata sit venditio bonorum, illum pecuniam grandem amissurum, sese capitis periculum aditurum; illum acuire, hos qui simul erant missi fallere; illum identidem monere ut caveret, hisce insidiose spem falsam ostendere; cum illo contra hos inire consilia, horum consilia illi enuntiare; cum illo partem suam depecisci, hisce aliqua fretum ora semper omnes aditus ad Sullam intercludere.* conspirant libri in *fretum ora*, nisi quod in non nullis inde factum est *fretus ora* aut *fretus hora* aut *fretus mora*. et *mora* quidem qui scripsit probabilem fecit coniecturam, *fretus* congruit cum orationis forma, sententiae minime convenit. iustam sententiam ut restituerent homines docti multa temptarunt, quod veri esset simile nemo invenit. mihi latere videtur *hisce aliqua* vafre *mora semper omnes aditus ad Sullam intercludere*. nam post *aliqua* facili errore *ua* omitti potuit: quo facto quod restabat male completum est.

LXXVI. Apud Senecam Suasoriarum capite primo haec leguntur, *Latini declamatores in descriptione Oceani non nimis viguerunt: nam aut minus descripserunt aut curiose.* non recipiendum erat mendum libri Bruxellensis: nam ineptum est accusativo casu dictum *in descriptionem*. altera sententiae pars intellegi non potest sic scripta,

potest autem si ita scripseris, *nam aut minus descripserunt aut nimis curiose.*

Pergit Seneca, *nemo illorum potuit tanto spiritu dicere quanto Peto, qui nâvigante Germanico dicit*

*iam pridem post terga diem solemque relictum,  
iam pridem notis extorres finibus orbis  
per non concessas audaces ire tenebras  
Hesperii metas extremaque litora mundi.*

versu Pedonis primo liber Bruxellensis *erga* habet: unde recipamus antiquam et valde usitatam scribendi rationem *pos terga*. mox non video quam utilitatem habeat insertum nuper *se inter notis et extorres*: immo si additur paullo etiam minus hi versus intelleguntur. versu quarto liber Bruxellensis *asperum* habet: ex quo *Hesperii* olim factum est nescio cuius coniectura, minime illa probabili, cum, ut alia taceam, in hac oratione, in qua *per non concessas — tenebras* praecessit, omissa *ad* praepositione offendamur. illud autem dubitatione carere mihi videtur, non potuisse Senecam e Pedonis carmine versus excerpere quorum non integra esset sententia. atqui deest aliquid his quattuor versibus quo sententia eorum consummetur. fiunt autem integri si ita scribuntur,

*iam pridem pos terga diem solemque relinunt,  
iam pridem notis extorres finibus orbis  
per non concessas audaces ire tenebras  
ad rerum metas extremaque litora mundi.*

*rerum metas* Peto dicit fines rerum naturae similiterque postea loquitur, *di revocant rerumque vetant cognoscere finem Mortales oculos*: paullo aliter eisdem illis verbis Vergilius Aen. 1 278 in Iovis oratione utitur, *his ego nec metas rerum nec tempora pono: Imperium sine fine dedi.*

Secuntur apud Senecam hi versus Pedonis,

*nunc illum (pigris immania monstra sub undis)  
qui ferat Oceanum, qui saevas undique pristis  
aequoreosque canes ratibus consurgere prensis.*

pessime haec vulgo interpunguntur: ita ut feci distincta ferri possunt neque opus est ut quicquam mutetur. minime autem *hunc illum* scribendum erat.

Continuatur carmen ita,

*accumulat fragor ipse metus. iam sidere limo  
navigia et rapido desertam flamine classem*

*seque feris credunt per inertia fata marinis  
tam non felici laniandos sorte relinqui.  
atque aliquis prora pendens sublimis ab alta  
aera pugnaci luctatus rumpere visu,  
ut nihil erepto valuit dinoscere mundo,  
obstructa in talis effundit pectora voces.*

quod versu tertio dicuntur *inertia fata*, similia leguntur, ne alia memorem, apud Ovidium Met. vii 544, *gemit leto moriturus inertis*, et apud Valerium Flaccum i 633, *haec iterant segni flentes occumbere leto*. ultimum versum, in quo Bruxellensis liber *obstructum talis* et *pectore* habet, Bursianus recte emendavit. minus recte *pendens* Gronovii recepit, quod nimium distat ab antiqua litterarum memoria. ex aliis codicibus adferuntur *sedat* vel *se dat* et *spectat*, Bruxellensis *cedunt* habet, unde illa rudi artificio facta sunt. sed potest *cedunt* leni emendatione emendari. scripsit Peto

*atque aliquis prora caecum sublimis ab alta  
aera pugnaci luctatus rumpere visu.*

eiusmodi epitheton paene necessarium est dixitque in simili re Vergilius Aen. iii 203 *tris adeo incertos caeca caligine soles Erramus pelago*.

Ipsa etiam quae secuntur speculatoris verba non carent mendo.

*quo ferimur? fugit ipsa dies orbemque relictum  
ultima perpetuis claudit natura tenebris.  
anne alio positas ultra sub cardine gentes  
atque alium liberis intactum quaerimus orbem?  
di revocant rerumque vetant cognoscere finem  
mortales oculos. aliena quid aequora remis  
et sacras violamus aquas divumque quietas  
turbamus sedes?*

*liberis* habet codex Bruxellensis. ineptissimum est quod olim scribebatur *libris*, non ineptum *lembis*, quod Oudendorpio inde faciendum videbatur, sed debile: *nimbis* alicui in mentem venire potuisse miror. conicio scribendum esse

*atque alium flabris intactum quaerimus orbem.*

dixerat antea Peto *rapido desertam flamme classem* congruitque quod *caecum aera*, id est obscuram nebulam, commemoravit, congruunt etiam quodammodo quae deinde adduntur.

LXXVII. In Calpurnii Laude Pisonis v. 34 recte sane Carolus Fridericus Weberus scripsit

*sic etiam magno iam tum Cicerone iubente  
laurea facundis cesserunt arma togatis,*

cum olim scriptum esset *iuventae*, cui *vigente* falsa coniectura substitutum est, sed ipse quod scripsit non recte interpretatus est. dixit enim 'emendavi *iubente*, quasi duce, qui nunc est.' quippe fugit eum *iam tum* non numquam ita dici ut non significet non postea tantummodo verum iam antea aliquid factum esse, sed praeteriti temporis notionem quasi intendat, non multum autem a simplici *tum* differat. veluti locutus est ita Nemesianus Ecl. III 18 ss., *te cano qui gravidis hederata fronte corymbis Viteaserta plicas quique udo palmite tigris Ducis odorato perfusus colla capillo, Vera Iovis proles: iam tunc post sidera caeli Sola Iovem Semele vidit Iovis ora professum:* de quibus versibus dixi in Relationibus Academiae Berolinensis a. MDCCCLVIII p. 671. Calpurnius igitur cum dicit *Cicerone iubente* nihil aliud significat quam iussum illud olim a Cicerone editum, *cedant arma togae, concedat laurea linguae.* nam *linguae* Calpurnium in Ciceronis carmine legisse vix potest dubitari, recteque Wernsdorfius Poet. Lat. min. t. IV p. 393 intellexit versum eius ita distinguendum esse,

*laurea facundis, cesserunt arma togatis.*

legitur autem *lingua* in Declamatione in Ciceronem 3 13. apud Quintilianum XI 1 24 libri inter *laudi* et *linguae* fluctuant, sed ut *linguae* potiore auctoritate confirmetur. tum *linguae* novit Plutarchus, qui in comparatione Demosthenis et Ciceronis cap. 2 haec dicit, ἡ δὲ Κικέρωνος ἐν τοῖς λόγοις ἀμετρία τῆς περιαντολογίας ἀκρᾶσίαν τινὰ κατηγορεῖ πρὸς δόξαν βοῶντος ὡς τὰ ὅπλα ἔδει τῇ τηβένῳ καὶ τῇ γλώττῃ τὴν θριαμβικὴν ὑπείκειν δάφνην. antiquius etiam his Plinii testimonium est Nat. hist. VII § 117, *salve, primus omnium parens patriae adpellate, primus in toga triumphum linguaeque lauream merite.* pulchre enim Wernsdorfius hoc ad decantatum Ciceronis versiculum rettulit. ipsum Ciceronem in oratione Pisoniana § 74 *laudi* scripsisse non potest dubitari propter ea quae addidit, idemque in libro de officiis I § 77 meliora exemplaria praebent.

Dixi de hoc Calpurnii versu ut praepararem emendationem alius versiculi quo memoria noti carminis similiter revocatur. ante illos versus quos quomodo Lachmannus coniuncta mecum opera emendaverit in fine eorum narravi quae de carminibus bucolicis Calpurnii et Nemesiani scripsi (non miror autem fuisse qui fruge inventa vesci mallet glandibus: nam quosdam homines mirari desii), ante illos igitur versus hi leguntur (230 ss.),



*ipse per Ausonias Aeneia carmina gentes  
qui sonat, ingenti qui nomine pulsat Olympum  
Maeoniumque senem Romano provocat ore,  
forsitan illius nemoris latuisset in umbra,  
quod canit et sterili tantum cantasset avena,  
ignotus populo, si Maecenate careret.  
qui tamen haud uni patefecit limina vati  
nec sua Vergilio permisit numina soli.*

excerpta vetusta, quorum duobus exemplaribus usus sum, habent *Ignotus populis*, quod placet, tum in postremo versu *nomina*, quod non magis ferri potest quam *numina*, quod multi probarunt. intellexit Lachmannus poetam scripsisse

*nec sua Vergilio permisit carmina soli.*

nimirum transtulit in carmen suum Vergilii illud Ecl. 1 9 s. *ille meas errare boves, ut cernis, et ipsum Ludere quae vellem calamo permisit agresti.* quod de Maecenate dicit, cum eo conspirat Martialis viii 56, *iugera perdiderat miserae vicina Cremonae, Flebat et abductas Tityrus aeger oves. Risit Tuscus eques paupertatemque malignam Reppulit et celeri iussit abire fuga.*

Multo etiam apertiore Vergiliani carminis significationem obscuravit librariorum error hominumque doctorum meliora exemplaria nimis venerantium superstitio in Ovidii Amorum 1 15 25. scriptum ibi est in optimis libris *Tityrus et fruges Aeneiaque arma legentur Roma triumphati dum caput orbis erit.* nihilo minus Ovidium non *fruges* dedisse, sed *segetes*, quod in non nullis libris est, praeter alios Bentleius intellexit. ita enim significandum erat illud *Quid faciat laetas segetes.*

LXXVIII. Valerius Flaccus initio libri primi Pelian in animo versasse narrat mortis qua Iasonem interimeret vias ac tempora; quam narrationem hoc versu (37) finit, *ira maris vastique placent discrimina ponti.* sequitur dolosa oratio qua Pelias Iasonem vellus aureum petere iubet. tum haec leguntur,

*mox taciti patuere doli, nec vellera curae  
esse viro, sed sese odiis immania cogi  
in freta, qua iussos sectantem quaerere Colchos  
arte queat. nunc aerii plantaria vellet  
Perseos aut curru saevos frenasse dracones  
creditus, ignaras Cereris qui vomere terras  
imbuit et flava quercum damnavit arista.*

non contigit hominibus doctis ut sententiam reciperarent qua duo versus destituti sunt. nam neque *sectantem quaerere* non offendit neque reliqua ibi intellegi possunt, non magis autem integra oratio in eis est quae de Triptolemo dicuntur aut saevitia potissimum draconum commemoranda erat. scripsisse videtur Valerius

*mox taciti patuere doli, nec vellera curae  
esse viro, sed sese odiis immania cogi  
in freta. qua iussos sectatur quaerere Colchos  
arte queat. nunc aerii plantaria vellet  
Perseos aut currus et quos frenasse dracones  
creditur ignaras Cereris qui vomere terras  
imbuat et flava quercum damnavit arista.*

cogitat Iason qua arte elusis maris periculis Colchos petere possit. sectandi verbum similiter dictum est atque in illo Horatiano *mitte sectari rosa quo locorum sera moretur*. non liberius autem traiecta sunt verba quam alibi a Valerio fit, veluti v 363, *pulchrum longissima quando Robur cura ducis magnique edere labores*. plurali denique curruum vocabulo unum curriculum Valerius significavit II 411 III 415 v 245 VI 6 et ante eum Vergilius Aen. I 486 VI 485 x 574 592 XII 350 485 918.

Idem Valerius VI 352ss. haec habet,

*arduus inde labos, medioque in corpore pugna  
conseritur. magno veluti cum turbine sese  
ipsius Aeoliae frangunt in limine venti,  
quem pelagi rabies, quem nubila quemque sequatur  
ille dies, obnoxia virum sic comminus haeret  
pugna nec arrepto velli de corpore possunt.*

miratur Burmannus Aeoliam absolute dictam: poterat meminisse versuum Vergilij Aen. I 50 ss., *taliam flammato secum dea corde volutans Nimborum in patriam, loca feta furentibus austris, Aeoliam venit*. sed in proximis versibus non sine causa haesit: nam non insolentius tantum dictum est *quemque sequatur ille dies*, sed post pelagi rabiem et nubila secuturum esse expectamus quod consimile illis sit imaginemque consummet. quocirca scribere audeo

*quem pelagi rabies, quem nubila quemque sequatur  
illuvies.*

satis erat imbrem commemorare, sed saepe Valerius res auget atque exaggerat. quam inluviem dicit Livio VIII 24 7 sunt *imbres continui campos inundantes*. Iustinus II 1 14 sive *inluvies aquarum principio*

*rerum terras obrutas tenuit, II 6 10 huius temporibus aquarum inluvies maiorem partem populorum Graeciae absumpsit. similiter Curtius VIII 14 4 namque, ut supra dictum est, imber violentius quam alias fusus campos lubricos et inequitabiles fecerat, gravesque et propemodum immobiles currus inluvie ac voraginibus haerebant. aliud paullo est quod Tacitus dicit Ann. XII 51, interim Zenobiam (id mulieri nomen) placida illuvie spirantem ac vitae manifestam advertere pastores.*

Studui tres Valerii versiculos ita emendare ut a libris quam fieri posset minimum recederem. sed aliquotiens ingeniosi homines protulerunt quae quamquam nulla litterarum similitudine commendantur tamen vera et retribuenda esse videntur poetae. sic in ipso principio carminis (I 10 ss.) unum versum Heinsius, alium Slothouwerus audacior quidem sed necessaria emendatione restituerunt: tertium paullo minore audacia mihi videor emendare. adloquitur Valerius Vespasianum,

*eripe me populis et habenti nubila terrae,  
sancte pater, veterumque fave veneranda canenti  
facta virum. versam proles tua pandet Idumen  
(namque potest), Solymo nigram pulvere fratrem  
spargentemque faces et in omni turre furentem.  
ille tibi cultusque deum delubraque genti  
instituet, cum iam, genitor, lucebis ab omni  
parte poli. neque enim Tyrii Cynosura carinis  
certior aut Graia Helice servanda magistris  
seu tu signa dabis, seu te duce Graecia mittet  
seu Sidon Nilusque rates. nunc nostra serenus  
orsa iuves, haec ut Latias vox impleat urbes.*

sunt hic quaedam obscura, sed perspicue tamen vaticinatur Valerius Domitianum bellum Titi Iudaicum carmine celebraturum esse, Titum patrem relaturum inter sidera, id est inter deos. versu septimo in libro Vaticano scriptum tantummodo est *cum genitor*, sed verum videtur *iam* quod additum est in Monacensi. illud autem non intellegitur, quid sit *ab omni Parte poli*. nam dicere potuit Valerius Vespasianum post mortem lucidum sidus esse futurum, sed uni omnia sidera ne ineptissima quidem adulatione tribuere potuit. nihil neque melius neque, ut puto, verius excogitari potest quam quod Heinsius invenit, *cum iam, genitor, lucebis ab alta Arce poli*, nisi quod probabilius etiam scribetur *alti*. depravationis causam non intellego neque ut intellegam multum laboro in perspicua emendationis necessitate. mox

*seu tu signa dabis* non potest ferri, neque vero probabilem efficit sententiam Gronovii *si tu signa dabis*, nec multo probabiliorem quod nuper scriptum est *cum tu signa dabis*. rectissime Slothouwerus intellexit scribendum esse *quam tu signa dabis*, neque litterulis nimium inhaerescemus, praesertim cum fieri potuerit ut huius versus initium propter initium proximi depravaretur. restant illa,

*ille tibi cultusque deum delubraque genti  
instituet.*

de quibus verbis non modo Burmannus, sed etiam Heinsius absurda commentati sunt. adparet nihil aliud Valerium dicere posse quam Titum consecraturum esse patrem. itaque *cultus deum* dicuntur divini honores, sed *genti* omnia turbat ac pervertit. non dubium mihi est Valerium scripsisse

*ille tibi cultusque deum delubraque centum  
instituet.*

Vergilius Aen. I 415 *ubi templum illi centumque Sabaeo Ture calent arae sertisque recentibus halant*, IV 199 *templa Iovi centum latis immania regnis*, Centum aras posuit, VIII 715 *dis Italis votum immortale sacrabat*, Maxima tercentum totam delubra per urbem.

LXXIX. Iohannes Schraderus Emendationum capite 7 p. 141 *sati*us apud optimos scriptores non adverbium sed adiectivum esse verissime dixit, etsi Propertii versum de quo disputavit (III 34 31), *tu satius memorem musis imitare Philetan*, falso credidit recte se habiturum esse si *sati*us in *potius* mutaretur: intellexerunt enim nostro tempore complures scribendum esse *tu Latius Meropem musis imitare Philetan*. idem *sati*us apud Varronem de re rustica I 2 26 perperam scriptum esse Lachmannus vidit Propertii p. 224. vituperantur ibi Sasernae quod in libris quos de agri cultura scripserunt multa protulerint ab ea re aliena: tum haec secuntur, *ego, quod magis, inquam, pertineat ad Fundanii veletudinem et in eo libro est satius dicam: nam huiusce pedes solent dolere in fronte contrahere rugas*. non pertinet ad rem de qua disputo utrum Scaligerum sequamur et *dolere* deleamus, an Popmam, qui *dolore* scribi posse putavit, an denique *et post dolere* in codice quem semiveterem et antiquo illo mendosiorum Politianus dicit insertum recipiamus, quod Gesnerus et Schneiderus fecerunt: illud certum est, *sati*us a probo sermone abhorrere. ante Victorium, quem *sati*us ex antiquissimo libro sumpsisse non dubito, *latius* legebatur. ne hoc quidem probari potest: nam non tantum idonea auctoritate caret, sed nihil deinde admodum late dicitur. Lachmanno

*potius* fortasse scribendum videbatur. expecto Keilii diligentiam: interim proferam quod mihi in mentem venit. narratur antea docere Sasernam quo medicamento utendum sit si quem glabrum facere velis, nimirum rana lurida in aqua decocta; iam ex eodem libro adferitur carmen quod medeatur pedum dolori, *terra pestem teneto, salus hic maneto*, reliquaque commemorantur quae Saserna fieri iubeat dum illud ter noviens cantatur. itaque Varro, qui haec ridet, videtur mihi hac uti potuisse dissimulatione, *ego, quod magis, inquam, pertineat ad Fundanii valetudinem et in eo libro est scitius, dicam*. non magis recte *satius* scriptum est in epistula Ciceronis ad Atticum iv 16. exponit Cicero cur in dialogis quos de re publica scribat non maiores partes tribuat Q. Mucio Scaevolae auguri dicitque se id exemplo facere Platonis, qui post primum *Πολιτείας* sermonem Cephalum dimoverit. pergit ita, *credo Platonem vix putasse satis consonum fore si hominem ad aetatis in tam longo sermone diutius retinuisset. multo ego satius hoc mihi cavendum putavi in Scaevola, qui et aetate et valetudine erat ea qua esse meministi et iis honoribus ut vix satis decorum videretur eum plures dies esse in Crassi Tusculano*. hic *satius* in libro Mediceo factum est a secunda manu, prima scripserat *satis*. abhorre *satius* a Ciceronis sermone Ernestius intellexit coniecitque scribendum esse aut *magis* aut *potius*. sed *potius* ineptum esse, cum non de electione cautionis, sed de eius magnitudine agatur, perspexit Wesenbergius Emend. Cic. epist. p. 39. is igitur *magis* probavit, a quo librarium putavit aberrasse ad *satis* quod paullo antea scripserat. incertum hoc est, certum autem repudiandum esse *satius*, commentum falsissimum. praeter haec, quae iam removi, *satius* adverbii significatione positi exempla duo tantum repperi. in Quintiliani qui dicitur Declamationum excerptis p. 382 Burm. haec scripta sunt, *quis potius morietur quam qui fere mortuus est? quis satius vivet quam per quem omnes vivunt?* verum antequam vetusta harum declamationum exemplaria diligenter explorata erunt et alias saepe haerebimus et hic ignorabimus quam fidem habeat insolentissimum illud *satius*, pro quo alia scribi possunt aptissime, veluti *iustius* et simplicius etiam *potius*. tum Ennodii est epigramma 54 p. 615 Sirm., *Respice portentum permixto iure creatum, Communis generis, satius sed dicitur omnis*. nisi Ennodii hoc esset fortasse suspicaremur scribendum esse *communis generis: satius, si dicitur omnis*: sed huic sane poetae usum concedemus ab antiqua consuetudine abhorrentem. itaque cum *satius* adverbialiter non tantum dictum sit rarissime, sed nullum eius signi-

fictionis certius paullo exemplum ante sexti post Christum saeculi initium reperiatur, magna sive audacia sive inscientia idem nuper inlatum est in librum aliquanto antiquiorem. in Aelli Spartiani Hadriano capite 20 codices haec praebent, *uno tempore scripsit dictavit et cum amicis fabulatus est si potest* (ita liber Bambergensis a secunda manu, Palatinus et a prima manu Bambergensis *potes*) *credi. omnes publicas rationes ita complexus est ut domum privatam quivis pater familias diligens non satis novit.* postrema non esse sana manifestum est. sed quod nuper scriptum est *non satius novit*, id triplici vitio laborat. ac primum quidem quam incredibile sit *satius* sic dictum ea docent quae disputavi. deinde fac ita potuisse dici: non consummatur eo probabilis sententia, sed necessario scribendum esset *novit*. denique *quivis* ineptum est: nam ita potius dicendum erat, *ut domum privatam nullus pater familias melius novit*, vel simili aliquo modo. itaque ne illud quidem probari potest quod alius excogitavit, *ut domum privatam quivis pater familias diligens non magis noverit.* mihi quod male additum est resecandum et hoc tantum Spartiani esse videtur, *omnes publicas rationes ita complexus est ut domum privatam quivis pater familias diligens.* nimirum lector aliquis incredulus quique Hadrianum nimis laudari putaret hic notas suas adposuit. plane enim eis adsentior qui verba illa *si potest credi* vel potius *si potes, crede* (nam hoc latere videtur) delenda esse censuerunt: nam Spartianus nisi ineptire voluit nihil eiusmodi potuit adicere. eundem autem cavillatorem qui illa addidit adscripsisse puto hanc interrogationem, *non satis novit?*

LXXX. In Iulii Capitolini vita M. Antonini philosophi capite 16 haec leguntur partim valde inepta, *post Veri obitum M. Antoninus solus rem publicam tenuit, multo melior et feracior ad virtutem, quippe qui nullis Veri iam impediretur aut simulatis callidae severitatis, qua ille ingenito vitio laborabat, erroribus aut his, quis praecipue displicebat M. Antonino iam inde a primo aetatis suae tempore, vel institutis mentis pravae vel moribus.* neque per se intellegitur qui esse possint simulati callidae severitatis errores neque Vero tribui potuit ulla severitas neque magis simulatio ulla aut calliditas. immo idem Capitolinus etsi lasciviam luxuriamque Veri reprehendit, tamen propterea eum laudat quod simplex fuerit. dicit enim in vita eius cap. 1 *erat enim morum simplicium et qui adumbrare nihil posset.* similiter cap. 3 *amavit tamen Antoninus Pius simplicitatem ingenii.* idem de M. Antonino philosopho in eius vita c. 29 scribit *dederunt ei vitio quod et*

*fictus fuisset nec tam simplex ut videretur aut quàm vel Pius vel Verus fuisset.* simplicitas autem illa dici etiam potuit veritas. Plinius Paneg. cap. 84 ita loquitur, *ut in illa tua simplicitas, tua veritas, tuus candor adgnoscur.* Martiali x 72 dicitur *rustica veritas.* non opus est de re nota plura congerere. sed veritas ista si calidior est praecepsque et inconsulta, erroribus est obnoxia et in vitiis ponenda. quae cum ita sint vix dubium est Capitolinum ita scripsisse, *quippe qui nullis Veri iam impediretur aut cumulatis calidae veritatis, quo ille ingenito vitio laborabat, erroribus et reliqua.*

Idem Capitolinus in vita Maximini iunioris cap. 6 haec narrat, scribit Aelius Sabinus, *quod praetermittendum non fuit, tantam pulchritudinem oris fuisse in filio ut etiam caput eius mortui, iam nigrum, iam sordens, iam maceratum diffuente tabo, velut umbrae pulchrioris videretur.* ante *umbrae* vocabulum libri vel habent, Bambergensis certe, de quo adfirmatur: nihilo minus *velut* recte scribitur. sed *umbrae pulchrioris* a Salmasio inepte explicatur, ceteri tacent: neque admittit sane ullam probabilem interpretationem. quid multa? scripsit Capitolinus *ut etiam caput eius mortui, iam nigrum, iam sordens, iam maceratum diffuente tabo, velut umbra pulchri oris videretur.* nam quod post *pulchritudinem oris* similiter dictum est *pulchri oris*, non utitur hic scriptor sermone tam eleganti ut ab eiusmodi verborum iteratione abhorreat.

LXXXI. Trebellius Pollio in Gallienis duobus cap. 18 de statua quam Gallienus pater sibi maiorem colosso fieri et in summo Esquiliarum monte poni voluit haec addit, *sed et Claudio et Aureliano deinceps stulta res visa est: siquidem etiam equos et currum fieri iusserat pro qualitate statuæ atque in actissima base poni.* scriptum est in Bambergensi libro *actissima*, in Palatino *acussima* in eoque recentior manus inde fecit *acutissima*. id cum vulgo probatum esset, Salmasius putavit scribendum esse *auctissima*: quod nego Latine dici hic potuisse. nihil latet reconditi, sed scripsit Pollio *atque in altissima base poni.* non usitata est in his vitis illa superlativorum forma, sed inveniuntur in libris non numquam solitaria eius exempla, de qua re quaedam Lachmannus dixit in commentario Lucretiano p. 124. est etiam ubi mendo obiecta sit, ut hic factum est.

Ibidem cap. 19 (Salonini cap. 1) haec narrantur, *unum tamen ponam, quod iucunditatem quandam sed vulgarem habuit, morem tamen novum fecit. nam cum cingula sua plerique militantium qui ad convivium venerant ponerent hora convivii, Saloninus puer sive Gallienus*

*his auratos costilatosque balteos rapuisse perhibetur et cum esset difficile in aula Palatina requirere quod perisset ac tacitis militibus viri detrimenta pertulissent, postea rogati ad convivium cincti adcubuerunt, cumque ab his quaereretur cur non ponerent cingulum, respondisse dicuntur 'Salonino deferimus,' atque hinc tractum morem ut deinceps cum imperatore cincti discumberent.* scriptum est in libro Bambergensi *costilatosque*, idemque ex Palatino Salmasius attulit, qui Bambergensem ignoravit. mirabili confidentia nuper scriptum est *bullatosque*, quasi, in his praesertim libris, mutare liceret minus notum vocabulum alio qualicumque temere arrepto. Salmasius primum eruditione abutitur et nova quaerit, deinde intellegit *costulatos* balteos (nam ita scribendum putat) esse fortasse balteos regulis quibusdam et virgis distinctos. poterat paullo certius statuere nisi ipse se argumento fraudasset. nam cum in Iulii Capitolini vita Maximini iunioris cap. 1 scriptum esset in libris *dextrocherium cum costula de hyacinthis quattuor*, non dubitavit legendum esse *cum copula*, id quod etiam Casaubono in mentem venerat. nos costulae vocabulum servabimus intellegemusque quattuor hyacinthorum seriem in dextrocherio eminentem, pariterque balteos illos putabimus gemmis virgarum specie dispositis ornatos fuisse. neque mutabimus quicquam, sed *costilatosque*, quamquam mirabimur fortasse verbi formam, tamen servabimus. memorabile est enim quod in Cangii Glossario adfertur ex Visitatione thesaurariae s. Pauli Londinensis anno mcllxxxv facta, quae legitur in Monastico Angl. t. iii p. 310, *duae phialae argenteae costilatae et deauratae cum alternis vineis*. nimirum quaedam Latina vocabula quibus media quae dicitur aetas usa est non tam libris quam usu quodam propagata erant. demonstrari id potest in plantarum quarundam nominibus, neque minus credibile est idem accidisse in aliquot quae ad artificia pertinebant verbis. itaque, ut dixi, Trebellio relinquamus quod libri ei tribuunt. sed non potest deinde scripsisse *ac tacitis militibus viri*, Salmasius autem cum excogitavit et confirmare studuit *ac taciti ex militibus viri*, quod nuper praepopere receptum est, non uno peccavit nomine. scribendum est *ac tacitis vultibus viri detrimenta pertulissent*.

Apud eundem Trebellium in Claudio cap. 13 haec leguntur, — *digitis usque adeo fortibus ut saepe equis et mulis ictu pugni dentes excusserit. fecerat hoc etiam adulescens in militia cum ludicro Martiali in campo luctamen inter fortissimos monstraretur: nam iratus ei qui non balteum sed genitalia sibi contorserat omnes dentes uno pugno ex-*



*cussit, quaerens indulgentiam pudore vindictae.* nondum hic omnia emendata sunt. oportet enim scribere *quaerens indulgentiam pudoris vindictae.* narrat mox Trebellius Decium imperatorem et virtutem et verecundiam Claudii publice praedicasse.

LXXXII. Symmachus Ep. II 73 *cape igitur litteras meas, quas adeo libenter emitto quia religionis tuae vicissim pascor alloquiis. quae res acuere debet ad officia promptiora, cum tibi in commodi fœnoris largior usura respondeat.* ita scriptum est in egregio libro Parisino, quo excusso Octavius Clasonus nuper effecit ut iam minus incerta sit harum epistularum emendatio. idem probabiliter coniecit *te* post *acuere* addendum esse. sed non recte putavit scribendum esse *incommodis.* nimirum coniunctis tantum duabus vocibus verum restituitur, *cum tibi incommodi fœnoris largior usura respondeat.* litterarum scribendarum molestiam a se frequentius rescribendo remuneratam Symmachus cum pecunia comparat quae non sine incommoditate fœnori data est, sed largas usuras reddit.

Ep. III 18 *restat, quod maxime volo, ut fatearis amicitiae negligentiam. nam officia si plerumque deseras, occupatio est; si semper, oblivio. transcrimen putas. hoc si fieret posset, tacerem. illudis ergo patientiae meae.* in depravato illo *transcrimen* Parisinus liber cum aliis conspirat. qualis sententia requiratur perspectum est a Clasono, qui scribendum esse coniecit *irati sermonem putas?* ipsum illud quod Symmachus scripsit non adsecutus est. nam id quod libri habent attentius intuenti hoc potius adparet, *si semper, oblivio.* irasci me *putas. hoc si fieri posset, tacerem.*

Ep. IV 56 *ad hoc filii nostri Nemesii pia ad larem patremque properatio magis contestationem de me solemnibus officiis quam satisfactionem desideravit. res postulat ut salute praefata florentissimae indoli eius testimonium feram. sed vereor ne ostentare operam meam videar: quae plus iuveni bonarum artium contulisset nisi fraternus casus frengisset cursum duorum. hoc tamen sincerissima fide dixerim, minutam quidem de altero parentis eius felicitatem, sed posse istum suorum gaudio pro utroque sufficere.* Iuretus e veteri codice adfert *Nemesi ipsa,* habetque liber Parisinus *nemesupsa:* videtur tamen *pia* verum esse. tum Parisinus liber *ad larem fratremque,* quod non est probandum. denique idem liber *parentis eius,* videturque *parentum eius* Iureti esse coniectura minime necessaria. contra necessaria est alius verbi emendatio. *cursum duorum* scriptum est in libro Parisino idemque ex aliis codicibus adfertur. *cursus duorum* legitur apud Iuretum, simul autem

dicitur *cursum auorum* esse in libro Pithoei. nihil horum sententiam prae-  
bet probabilem. mihi manifestum esse videtur scripsisse Symma-  
chum *nisi fraternus casus fregisset cursum* studiorum.

LXXXIII. In codice bibliothecae regiae Berolinensis Santeniano  
66, qui quae contineat ab Henrico Keilio Grammaticorum t. iv p. xxxii  
expositum est, paginis 218 et 219 post quattuor versus extritos et  
partim noxio medicamine absumptos haec leguntur saeculo nono  
scripta,

*M̄ annei lucani. belli ciuilis. libri quinque sic*

*Incipit. Bella per eamithios plus quam ciuilia campos*

*Iusque datum sceleri canimus populumque potentem*

*In sua uitrici conuersum uiscera dextra*

*Libri papini statii thebaidos. libri duodecim*

*Terentii andria. libri multi*

*Incipit eunuchus. sic incipit thais meretrix*

*parmeno seruus. pamphilus adulscens. sostra*

*ta mulier. pamphilus adulscens. bachimeretrix*

*antichila mulier. clinia adulscens. sirus seruus*

*Iuni Iuuenalis saturarum lib. I. DE INCOM*

*modis meritorum. lib. II. feliciter. sic Incipit*

*credo pudicitiam. saturno rege moratam. In terris uisamque*

*diu cum frigida paruas præberit spelunca domus ignem*

*que laremque Diui Iuuenalis saturarum lib. II. explicat*

*Incipit lib. III de sterelitate studiorum*

*Albi Tibulli lib. II.*

*Horatii Flacchi. ars poetica explicat. INCIPIT*

*glaudiani deraptu proserpinae lib. III sic Incipit In*

*ferri raptoris equos adflataque curru*

*Ad rufinum lib. II.*

*Claudii In eutropium lib. III.*

*Debello Gothico*

*Debello gildonico*

*Valeri martialis epigrammatum libri VIIII*

*ad lucanum et tullum*

*Incipit uictoris artis rhetoricae partis*

*Seruius aquilino*

*In catelena ciceronis libri VII.*

*Deiotaro rege*

*INCIPIT uerrem actio. M. tullii. ciceronis*

*INCIPIT uerrem libri VIII*

*INCIPIT Sallustii crispi orationis ex catilena*

*Sententia catonis In senatu*

*Sententia ex iugurtha et historia V*

*Libri alchimi sic incipit In adulescentiam*

*qui In publico patre cadente risisset. et lan-*

*guenti puellae amatorium dedit*

*De controuersia fullonis uel calui*

*..... Incipit messi oratoris de elocutionibus*

*olybrio et probino messius*

Fuerunt igitur saeculo nono in quadam regni Francici bibliotheca libri non nulli quorum ne amissorum quidem notitia inutilis est. persequar memorabiliora.

Tibulli librorum per medium quod dicitur aevum nulla antiquior extat memoria. cum duo eius libri numerentur, non integrum fuisse videtur exemplar. venit igitur in mentem fragmentum illud per vetustum, ut Scaliger p. 171 dicit, quod a III 4 65 incipiebat: sed praestat non ariolari. in eis quae hodie extant scriptis Tibulliani corporis exemplaribus tres esse solent libri, coniunctis tertio et quarto. quae exemplaria non potest dubitari deducta esse ex eo codice quem saeculo quarto decimo Guilelmus Pastrengus legit, acceptum fortasse a Francisco Petrarcha: de qua re alias dixi (*Ber. der k. sächs. ges. der wiss. t. I p. 257*).

Quod scriptum est *Valerii Martialis epigrammatum libri VIII ad Lucanum et Tullum*, nimirum epigramma 136 in libro Puteani ita inscriptum est, *ad Lucanum et Tullum*.

Quod sequitur *Servius Aquilino* initium est libri de finalibus.

In Ciceronis librorum numeris turbatum est. comprehenduntur fortasse numerando diversae orationes. ita cum scriptum est antea *Terentii Andria. libri multi* intellegendae esse videntur sex Terentii comoediae: neque enim de multis Andriae exemplaribus cogitaverim.

Orationum ex Sallustii Catilina Iugurtha Historiis excerptarum unum novimus exemplar vetustum Vaticanum.

Qui secuntur *libri Alchimi* ad Alcimum Ecdicium Avitum, episcopum Viennensem, non sunt referendi. incipere dicuntur ita, *In adulescentem* (ita enim scribendum est) *qui in publico patre cadente risisset* (immo *risit*) *et languenti puellae amatorium dedit*. fuit aut carmen aut declamatio, idemque dicendum est de *controversia fullonis*

*vel* (id est *et calvi*: quamquam non capio quae illa potuerit esse controversia. fuit autem Latinus Alcimus Alethius rhetor, quem Ausonius Professorum Burdigalensium carmine altero celebrat. cum dicit eum *palmae forensis et camenarum decus* et oratorem laudat et poetam. ex eodem carmine discimus Alcimum aut scripsisse aut scribere voluisse libros de Iuliano imperatore et de Sabino qui cum Iuliano consul fuit anno post Christum natum CCCLXIII. ad eum Alcimum pertinet quod Hieronymus in anno Abrahae MMCCCLXXI, id est in anno Christi CCCLVI scribit, *Alcimus et Delphidius rhetores in Aquitanica florentissime docent*. laudat Alcimum Apollinaris Sidonius Ep. viii 11 et simul cum Delphidio Ep. v 10. tribuuntur huic Alcimo ab hominibus doctis carmina non nulla, de quibus Wernsdorfius dixit Poet. Lat. min. t. vi p. 28ss. non minore probabilitate eidem Alcimo tribuemus quae in Santeniano libro commemorantur.

Denique docemur quo tempore Arusianus Messius vixerit. et composuisse eum Exempla elocutionum postquam Constantinus tres comitum ordines instituit inde intellegi poterat quod Gudii apographum hunc habet titulum, *Arusiani Messi v. c. or. comitis primi ordinis exempla elocutionum ex Virgilio Sallustio Terentio Cicerone*. Santenianus liber docet praefationem habuisse Exempla eiusque primum versum hunc fuisse, *Olybrio et Probino Messius*. Olybrius et Probinus consules fuerunt anno post Christum natum CCCLXXXV. itaque aut eodem illo anno Messius Olybrio et Probino Exempla elocutionum dedicavit similiter atque Claudianus carmen aut certe circa illud tempus: nam cum fratres illi essent, potuerunt omnino praeter consulationem occasionem uni libello utriusque nomina inscribi.

LXXXIV. Saeculi nomen unde deductum sit ignoro ingeniosissime quas proferri memini opinionationibus diffido, illud autem certum est, nugari Varronem cum libro de lingua Latina vi p. 193 Sp. existimat *dictum a sene, quod longissimum spatium senescendorum hominum id putant*. neque minus ineptum est (quamquam in eundem errorem incidit Iosephus Scaliger in Coniectaneis) quod Isidorus Orig. v 38 1 dicit, *secula generationibus consistunt et inde secula dicta quod se sequantur: aberuntibus enim aliis alia succedunt*. protulerat eandem originationem Primasius episcopus Africanus in Commentario in epistulam ad Hebraeos capite 11, *secula vero, ut Ovidius Naso dicit, dicuntur a sequendo; eo quod sese sequantur atque revolvantur, teste Varro*. potest autem fieri ut Isidorus quae de saeculis dicit a Primasio sumpserit, quem commemorat in Catalogo scriptorum ecclesiasticorum

cap. 9. non solet Primasius eiusmodi eruditionem ostentare neque, si recte memini, praeterea gentiles scriptores commemorat, nisi semel Ciceronem in Commentario in epistulam ad Galatas capite 6, *videas plerosque, quod etiam Tullius ait, libros suos de contemnenda gloria inscribere et causa gloriae proprii nominis titulos praenotare*. his illud dixit Cicero, Tusc. disp. 1 § 34 et or. pro Archia poeta § 26. Varronis aliam de vocabulo quod est saeculum a Primasio adferri opinionem quam quae prolata ab illo est in libro sexto de lingua Latina non valde mirum est: nam potuit Varro alias aliter opinari. illud autem sane mirum est quod Ovidius Naso saeculi vocabulum explicasse atque in eam rem Varronis auctoritate usus esse dicitur: neque enim Varronis mentio ab eis quae Ovidio tribuuntur videtur separari. atqui nihil in Ovidii carminibus reperitur quod aut eiusmodi Varronis mentionem faciat aut ad interpretandum saeculi vocabulum referri possit. itaque nisi Primasius mirabiliter erravit (nam de fraude et mendacio nemo cogitabit), a librario aliquo Ovidium Nasonem per errorem inlatum esse putabimus. sed iudicent doctiores: nimirum licet, opinor, interdum ἀπορήματα proferre quorum λύσεις frustra quaesivi.

LXXXV. Photius in Lexico p. 183 9 κύβιτον (codex κυβήττον) Ἰωνες τὸ ἄκρον τοῦ ἀγκῶνος. οὕτως Ἐπίχαρμος. Pollux II 141 καὶ τοῦ πήχεως τὴν ὑπὸ τῷ βραχίονι συμβολὴν κατὰ μὲν τὴν ἔνδοθεν κοιλότητα ὠλέκρανον καλεῖσθαι νομίζουσιν, κατὰ δὲ τὴν ἔξωθεν συμβολὴν ἀγκῶνα· τὸ γὰρ κορωνὸν ἱατρικὸν ἐστίν. ὀνομάζουσι δὲ τοῦτο καὶ κύβωλον. καὶ κύβιτον εἴποισι ἂν ὡς Ἰπποκράτης (de locis in hom. p. 410 Foes.)· δοκεῖ δ' εἶναι Ἀωρικὸν τοῦνομα τῶν ἐν Σικελίᾳ Ἀωρίων, ὅθεν Ἐπίχαρμος καὶ τὸ παῖειν τῷ ἀγκῶνι κυβιτίζειν λέγει. non fugerunt haec eos qui Epicharmae poesis reliquias conquisiverunt: fugit quod apud Rufum Ephesium de part. hom. I p. 29 Clinch. legitur, μετὰ δὲ τὸν βραχίονα ἀγκῶν τὸ σύμπαν ἄρθρον καὶ τὸ ὅξυ ἐφ' οὗ κλινόμενοι στηριζόμεθα· οἳ δὲ ὠλέκρανον καλοῦσι, Ἀωρεῖς δὲ οἳ ἐν Σικελίᾳ κύβιτον. Ἐπίχαρμος δὲ καὶ τὸ παῖειν τῷ ἀγκῶνι κυβιτίζειν ἔλεγεν.

Pollux II 223 δύο δὲ δὴ περὶ τῷ ἐμβρῶνι χιτῶνες εἰσίν, ὧν τὸν μὲν ἔνδοθεν λεπτότερον καὶ μαλακώτερον ἀμνίον Ἐμπεδοκλῆς καλεῖ, τὸ δὲ ἔξωθεν ἐπ' αὐτῷ, τὸ πρὸς τῇ ὑστέρᾳ, χόριον ὀνομάζεται, οὗ καὶ ὁ ὀμφαλὸς ἐκπέφυκεν. Rufus I p. 45 τὸ δὲ βρέφος περιέχεται χιτῶσι. τὸ (scr. τὸν) μὲν

λεπτὸν καὶ μαλακὸν ἀμνιον αὐτὸν Ἐμπεδοκλῆς καλεῖ. ἐντεῦθεν μοι δοκεῖ καὶ Εἰλείθυια ἀμνιας ἐπωνόμασται καὶ μᾶλλον ἢ περ ἀπὸ τοῦ ἐν Κρήτῃ λιμένος. ἐωρῶμεν δὲ ἀνατέμνοντες τοῦτον τὸν χιτῶνα περιέχοντα ὕγρον, πολὺ δὲ καθαρώτερον τοῦ ἐν τῷ χορίῳ, καὶ λογιζομένοις μὲν ἐφαίνεται ὥσπερ ἰδρῶς εἶναι τοῦ βρέφους, τὸ δὲ διὰ τοῦ οὐραχοῦ ὥσπερ οὖρον εἰς τὸ χόριον ἐκδιδόναι. ἀλλ' ὁ μὲν ἀμνιος ἐνδοθεν ἦν καὶ περὶ τῷ βρέφει, τὸ δὲ χόριον ἔξω καὶ περὶ τῇ ὑστέρᾳ, βραχὺς καὶ φλεβώθης χιτῶν. ἐκ δὲ τοῦ χορίου ἐκπεφύκει ὁ ὀμφαλός, δύο φλέβες καὶ δύο ἀρτηρίαι καὶ πέμπτος ὁ καλούμενος οὐραχός, ἀγγεῖον βραχὺ καὶ ἀμφίστομον ἀπὸ τοῦ πνυθμένος τῆς κύστεως εἰς τὸ χόριον ἐμβάλλων (scr. ἐμβάλλον).

Exscripsi haec ut adpareret, quod nondum animadversum esse videtur, Pollucem in componendo altero Onomastici libro usum esse copiis Rufi Ephesii. dicit autem Pollux in praefatione libri alterius πολλὰ δὲ καὶ οἱ τῷ περιπάτῳ συνήθεις ἐμῆννον ἡμῖν, αὐτοὶ τὰ παρ' αὐτῶν καὶ τὰ παρὰ τῶν ἱατρῶν ἀθροισάμενοι, παρ' ὧν καὶ ἡμεῖς τινὰ τούτων συνελέξαμεν. ὧν γὰρ μετὰ τὴν πεῖραν ἡ γνῶσις, τούτων ἡ χρεια παρὰ τῶν πείρα γόντων ἀναγκαία. excluditur omnis dubitatio. nam quae Rufus de membranis quae fetum involunt et de umbilico tradit ea non aliunde accepit, ut possimus credere et ipsum et Pollucem ex communi aliquo fonte hausisse, sed vidit in dissectis praegnantium mulierum cadaveribus manifestumque est Pollucem quae ille docuit in suum usum convertisse. etenim verba etiam eius partim servavit aut ita ut fieri oportebat mutavit, veluti ἐκπεφύκει in ἐκπέφυκεν.

Hinc colligitur Pollucem etiam alia in quibus cum Rufo congruit non aliunde sumpsisse. transcribam potiora et in quibus nulla videtur esse dubitatio.

Rufus I p. 25 ἀπὸ δὲ τοῦ μεσοφρύου τέταται ἡ ῥίς. ταύτης δὲ τὰ μὲν τρήματα ῥώθωνες καὶ μυκτῆρες. Ἀθηναῖοι δὲ καὶ μύξας ὀνομάζουσιν. Ἱπποκράτης δὲ τὸ φλεγματοῦδες ἰδὼν δι' αὐτῶν περίττωμα μύξαν καλεῖ, Ἀθηναῖοι δὲ τὸ περίττωμα τοῦτο κόρυζαν καλοῦσιν. Pollux II 71 ῥίς καὶ μυκτῆρ καὶ μυκτῆρες, καὶ παρὰ τοῖς ἱατροῖς ῥώθωνες. παρὰ δὲ Σοφοκλεῖ καὶ μύξαι οἱ μυκτῆρες κέκληνται. 78 νοσήματα δὲ ῥινῶν τὸ μὲν ἐκ ψύξεως κόρυζα καὶ κατάρρους, τὸ δὲ δυσίατον πολύπους. τὸ ρεῦμα μύξαι (rectius alii μύξα) κατὰ Ἱπποκράτην καὶ κόρυζα κατὰ τοὺς Ἀττικούς. vocem quam Rufus Atti-

cam dixit Pollux, diligens tragoediarum lector, ut Sophocleam notat: versum Sophoclis praebet Aelianus de nat. an. vii 39.

Rufus p. 25 τὸ δὲ μεταξὺ τῶν τρημάτων χονδρῶδες ῥινὸς διάφραγμα, τὰ δὲ ἑκατέρωθεν ἐπὶ τὰ μῆλα νεύοντα ὀστώδη ῥινὸς ῥάχις, τὸ δὲ πέρας τοῦ ὀστώδους ὑψώματος τὸ ἔνθεν καὶ ἔνθεν πτερύγια· ταῦτα δὲ καὶ κινεῖται ἐν ταῖς σφοδραῖς δυσπνοιαῖς καὶ ἄλλως βουληθέντων. τὸ δὲ πρὸ τοῦ διαφράγματος τῆς ῥινὸς σαρκῶδες ἐπὶ τὸ χεῖλος καθῆκον κίων, τὸ δὲ ἄκρον τῆς ῥινὸς σφαιρίον, τὸ δὲ ὑπὸ τῷ κίονι ἐν τῷ ἄνω χεῖλει κοῖλον φρίκρον, τὸ δὲ ὅλον μετὰ τὴν ῥίνα τοῦ ἄνω χείλους ὑπορρίνιον. εἶτα χεῖλη δύο, ὧν τὰ μὲν ἄκρα πρό-χειλα, τὸ δὲ σύμβλητον τῶν χειλῶν προστόμιον, τὸ δὲ ἐπὶ τῷ κάτω χεῖλει κοῖλον νύμφη. Pollux 79 τὸ δὲ μέσον χόνδρος, τὰ δ' ἑκατέρωθεν ἐπὶ τὰ μῆλα νεύοντα ὀστώδη ῥινὸς ῥάχις. τὸ δὲ τὰ τρυπήματα διαιροῦν ὥσπερ τειχίον κίων καὶ διάφραγμα καὶ στυλὶς· ἔνιοι δὲ τὸ μὲν ἔνδον διατειχίζον διάφραγμα ῥινός, τὸ δ' ὑπὲρ αὐτὸ προὔχον σαρκῶδες, ὡς ἐπὶ τὸ χεῖλος φέρον, κίονα. τὸ δὲ ἀκρορρίνιον ὅλον σφαιρίον. 90 ἡ δὲ ἐν τῷ κάτω τύπος ἢ νύμφη. καὶ τὸ μὲν προὔχον αὐτῶν προχειλίδια, ἡ δὲ εἰς ἄλλα τῶν χειλῶν συμβολὴ προστόμιον.

Rufus p. 26 τῶν δὲ ὥτων ἀκοὴ μὲν ὁ πόρος δι' οὗ ἀκούομεν, λοβὸς δὲ τὸ ἐπικρεμές, ὅπερ καὶ μόνον Ἀριστοτέλης φησὶ τοῦ ὥτος ὀνομάζεσθαι, τὰ δὲ ἄλλα ἀνώνυμα εἶναι· οἱ δὲ ἱατροὶ καὶ ταῦτα ὠνόμασαν, πτερύγιον μὲν τὸ ἀνωτάτω πλατὺ ἐπικλινές, ἔλικα δὲ τὸ ἐντεῦθεν συμπληροῦν τὴν περιφέρειαν τῶν ὥτων, ἀνθέλικα δὲ τὸ ἐν μέσῳ ὑπεραιρον τὴν κοιλότητα, κόγχην δὲ τὸ ἀπὸ τῆς ἀνθέλικος κοῖλου, τὸ δὲ ἀπεναντίον τῆς κόγχης ἕξαρχμα παρὰ τὸ πέρας τοῦ κροτάφου τράγον, τὸ δὲ τῆς ἔλικος τέλος τὸ ὑπόβραχυν ἀντιλοβίδα. Pollux 85 καὶ τὸ μὲν ἐπὶ τοὺς κροτάφους ἐπικλινὲς πτερύγιον, τὸ δὲ κάτω λοβός. — τοῦ δὲ κοῖλου τὸ μὲν ὑπὸ τὸ πέρας τοῦ κροτάφου ὑπανεστηκὸς εἰς τὸ ἔσω νεῦον τράγος. 86 ἡ δὲ πᾶσα περιαγωγή τοῦ ὥτος ὑπὸ τὸ πτερύγιον ἔλιξ, καὶ τὸ ἀνθεστηκὸς αὐτῇ ἀνθέλιξ, καὶ τὸ ὑπ' αὐτῇ κόγχη. ταῦτα μὲν δὴ ἱατροὶ προσεξεῦρον τὰ ὀνόματα· ὁ δ' Ἀριστοτέλης τὰ περὶ τὸ οὗς μέρη ἀνώνυμα ᾤετο πλὴν λοβοῦ.

Rufus p. 27 ἡ δὲ πρὸς τῷ ἄνω χεῖλει πρώτη βλάστη προπωγώνιον, αὐξηθεῖσαι δὲ αὐται αἱ τρίχες μύστακες, αἱ

δὲ ἐπ' ἄκρον τοῦ γενείου πάππος, αἱ δὲ κάτω τῆς γένυος ὑπὴν. Pollux 80 αἱ δὲ ὑπὸ ξινὶ τρίχες μύσταξ καὶ ὑπορρίνιον, καὶ προπωγώνιον ἢ πρώτη βλάστη· αἱ δὲ πρὸς τῷ κάτω χεῖλει πάππος, τὸ δὲ ἐξ ἀμφοῖν ὑπὴν.

Rufus p. 27 στόμα δὲ καὶ ἡ πρώτη τομὴ τῶν χειλῶν. Pollux 98 τὸ δὲ ἔνδον τῶν χειλῶν στόμα, ὥσπερ καὶ ἡ τῶν χειλῶν τομή.

Rufus p. 28 μετὰ δὲ τὴν κεφαλὴν τράχηλος, τὸ δὲ αὐτὸ καὶ δειρὴ καὶ αὐχὴν, ὑποδερὶς (scr. ὑποδερὶς) δὲ τὸ ἐκ τῶν πρόσθεν τελευταῖον τῆς δειρῆς. Pollux 130 κεφαλῇ γε μὴν ὑπόκειται τράχηλος. καλεῖται δὲ καὶ αὐχὴν καὶ δειρὴ, ὅθεν καὶ ὑποδερὶς τὸ ἐν τοῖς πρόσθεν τελευταῖον.

Rufus p. 29 μασχάλη δὲ ἐστὶ τὸ ὑπὸ τῷ ὤμῳ κοῖλον, εἰς ἣν τὰ πολλὰ ὀλισθαίνει ὁ ὤμος· μάλην δὲ οὐχ Ἑλληνικὸν ὀνομάζειν. τὸ δὲ φέρειν τι κρύπτοντα ἐν τῇ μασχάλῃ ὑπὸ μάλης ἔχειν λέγεται. Pollux 139 ἡ δὲ μασχάλη ὑπὸ μὲν τῶν ἰδιωτῶν καλεῖται μάλη, ὑπὸ δὲ τῶν Ἀττικῶν οὐχί, ἀλλὰ τὸ ὑπὸ αὐτῇ φερόμενον ὑπὸ μάλης φέρεσθαι λέγουσιν. conf. Lob. Phryn. p. 196.

Rufus p. 30 θέναρ δὲ τὸ μεταξὺ διάστημα τοῦ λιχανοῦ καὶ τοῦ μεγάλου δακτύλου σαρκῶδες, ὅφ' ᾧ τὸ κοῖλον τῆς χειρὸς. ὑποθέναρ δὲ τὸ ὑπὸ τοῖς τέτρασι δακτύλοις. δοκεῖ δέ μοι Ἰπποκράτης πᾶν τὸ πλατὺ τῆς χειρὸς θέναρ ὀνομάζειν. Pollux 143 καὶ τὸ μὲν ἐνδοθεν τῆς χειρὸς σαρκῶδες, ἀπὸ τοῦ μεγάλου δακτύλου μέχρι τοῦ λιχανοῦ, θέναρ καλεῖται, τὸ δὲ ἔξωθεν ὀπισθέναρ, τὸ δὲ ἀπὸ τοῦ λιχανοῦ ἕως τοῦ μικροῦ δακτύλου ὑποθέναρ. — ἔνιοι δὲ τὸ μὲν πρόσθιον τῆς δρακὸς πᾶν θέναρ οἶονται καλεῖσθαι, καὶ Ἰπποκράτης καὶ Ὅμηρος τοῦτο ὑποδηλοῦσιν.

Rufus p. 32 τὸ δὲ ὑπερκείμενον τῷ ὀμφαλῷ δέρμα γραῖα, ὅτι ῥυτιδούμενον γῆρας σημαίνει. Pollux 170 τὸ δὲ περὶ τῷ ὀμφαλῷ δέρμα γραῖα, ὅτι ῥυσοούμενον γῆρας σύμβολον γίνεται.

Rufus p. 32 καὶ τὸ χαλῶμενον τοῦ ὀσχεύου λακκόπεδον· οἱ δὲ ἀχιχάδαρον ἢ λακκοσχέαν τοῦτον Ἀθηναῖοι καλοῦσι. τὸ (scr. τὰ) δὲ μεταξὺ ὀσχεύου καὶ ὑποστήματος καὶ μηροῦ πλιχάδα (scr. πλιχάδες) καὶ τὸ διαβαίνειν διαπλήσσειν (scr. διαπλίσσειν) καὶ τὸ περιβάδην ἀμφιπλήξ (scr. ἀμφιπλῖξ)· Σοφοκλῆς δὲ καὶ ἐπὶ δρακόντων ἐποίησε “Θαιρὸν ἀμφιπλήξ (scr. ἀμφιπλῖξ) εἰληφότε,” ὥσπερ ἂν εἰ ἔφη περιβεβηκότε τὸν



Θαιρόν. Pollux 172 τὸ δὲ τῶν ὄρχεων ἢ διδύμων ἀγγεῖον ὄσχεον, οὗ τὸ χαλῶμενον λακκόπεδον· τὸν δὲ ἀεὶ χαλαρῇ τούτῳ κεκρημένον λακκοσχέαν Ἀθηναῖοι καλοῦσιν. τὰ μέντοι μεταξὺ ὑποστήματος καὶ ὄσχεον καὶ μηροῦ πλιχάδες καλοῦνται, ὅθεν καὶ τὸ διαβαίνειν οἱ ποιηταὶ ἀμφιπλίσσειν λέγουσι, καὶ τὸ περιβάδην ἀμφιπλῖξ, ὡς καὶ Σοφοκλῆς κατεχρήσατο ἐπὶ δρακόντων εἰπὼν “Θαιρόν ἀμφιπλῖξ εἰληφότα,” οἷον περιβεβηκότα. depravatorum apud Rufum verborum οἱ δὲ ἀχιχάδαρον ἢ λακκοσχέαν τοῦτον Ἀθηναῖοι καλοῦσι facilis est emendatio ubi Pollucem comparaveris: scribendum est enim ᾧ δὲ ἀεὶ χαλαρόν ἢ, λακκοσχέαν τοῦτον etc. contra apud Pollucem in Sophoclis verbis peccatum est: satis enim constat verum eius in Triptolemo hunc fuisse, δράκοντε Θαιρόν ἀμφιπλῖξ εἰληφότε.

Alia omisi: quae persequetur si quis de Polluce adcuratius commentabitur. illud addo, Rufi Ephesii opusculis a Christiano Friderico Matthaei Mosquae anno mccccvi editis me non potuisse uti.

LXXXVI. Velleius Paterculus 1 13 *Mummius tam rudis fuit ut capta Corintho, cum maximorum artificum perfectas manibus tabulas ac statuas in Italiam portandas locasset, iuberet praedici conducentibus, si eas perdidissent, novas eos reddituros.* qui Velleii historiam interpretati sunt non norant neque, ut videtur, poterant nosse quod legitur in Hieroclis Facetiis p. 283 Boiss., σχολαστικὸς εἰκόνας ἀρχαῖα ζωγραφήματα ἐχούσας ἀπὸ Κορίνθου λαβὼν καὶ εἰς ναῦς ἐμβαλὼν τοῖς ναυκλήροις εἶπεν “ἐὰν ταύτας ἀπολέσητε, καινὰς ὑμᾶς ἀπαιτήσω.” non fugit Velleii narratio Boissonadum. usum autem illum dicendi quo fatui vocantur σχολαστικοί et morem illum de scholasticis ridicularia narrandi aliquanto quam vulgo putari videntur antiquiores esse Galeni verba docent Meth. med. 11 5 t. iv p. 52 Bas. x p. 38 Chart., πρὸς ταῦτ’ οὖν οἱ τὸ θερμόν καὶ ψυχρόν βαλανέων, οὐκ ἰατρῶν ὀνόματα φάσκοντες εἶναι βωμολοχεύονται δηλονότι καὶ γελοιοποιήσουσιν ἢ μωροὺς ἢ Φρύγας ἢ σχολαστικούς διηγούμενοι· συνίσασσι γὰρ ἑαυτοῖς οὐ μόνον ἀποδεικτικὸν ἐπισταμένοις οὐδέν, ἀλλ’ οὐδ’ ὅ τι ποτέ ἐστιν ἀπόδειξις ἐπαΐουσιν.

LXXXVII. Breviter significabo emendationem duorum versuum Truculenti, fabularum quae extant Plautinarum mendsissimae.

11 4 71

*non audes aliquod dare mihi munusculum?*

*DIN. lucrum hercle videor facere mihi, voluptas mea,  
ubi quidpiam me poscis. PHR. at ego ubi abstuli.*

*DIN. iam faxo hic aderit: servolum huc mittam meum.*

*PHR. sic facito. DIN. quidquid attulerit, boni consulas.*

*PHR. ecastor munus te curaturum scio  
ut quoniam me non paeniteat mittas mihi.*

v. 73 libri *posces*: quod olim correctum est. v. 75 libri *aut  
uierit*. tum *bona*: quod olim correxerunt. *boni* unam syllabam efficit.

II 6 49

*adduxi ancillas tibi eccas ex Suria duas.*

*is te dono. adduce hoc tu istas. sed istae reginae domi  
suae fuerunt ambae, verum patriam ego excidi manu.*

*is te dono. PHR. paenitetne te quot ancillas alam,  
quine examen super adducas, quae mihi comedint cibum.*

v. 52 *quot ancillas alam* perbene Andreas Spengelius: *quod an-  
cilla siam B, quod ancillast iam CD, quod ancillam solam* scriptum est  
apud Donatum in Eun. v 7 12. v. 53 libri *quin etiā men*. quod exa-  
men dicit quae duae sunt convenit protervae meretrici. *quine* idem  
fere est quod *quippe qui*, ut alibi haud ita raro.

M. HAUPT.